

四庫全書

史部

欽定四庫全書

史部

何文簡疏議卷四

詳校官國子監司業臣納麟寶

編修臣表謙覆勘

總校官庶吉士臣何思鈞

校對官中書臣李荃

謄錄監生臣王焜

欽定四庫全書

何文簡疏議卷四

明 何孟春 撰

議國課疏

題為議處國課以安邊民事臣惟天下之事有利必有
害論事者不可不知利與害事之利害一寡或一多知
利害者不可不酌寡與多今日雲南地方之有銀場或
謂當開或謂當閉謂開者曰利謂閉者曰害謂開者曰
此國課所係近來礦脉出雖不多而有礦夫已賠糧銀

又有夫丁乾認銀兩課額已定若何閉之此則所謂利也謂閉者曰朝廷富有四海豈賴遐荒錐刀遺利礦夫夫丁一皆朝廷赤子春味夏煦百五十年理在漸摩法難剗削今礦脉微弱課額不行減除場坑又不封閉乃使貧軍瘠士賠貲抵鑄十倍所出寧無有負皇上愛養元元初意此則所謂害也臣切惟利害兩端一寡一多聽聞人言已畧可辨但事干國課當閉當開撫臨之初不敢自決會同鎮守雲南總兵官征南將軍太子太傅

黔國公沐崑巡按雲南監察御史萬鎡公同都布按三
司官查議得雲南大理等府地方原設新興等銀場九
處原撥各衛軍充礦夫採挖歲辦銀兩除前巡撫都御
史李士實奏減外該軍一萬七千四百四名辦銀三萬
一千九百二十兩節因鎮守內臣差去人員分管各場
招集義夫採挖未免囊橐其間以致歲辦不敷將礦夫
口糧折辦又將各夫餘丁乾認銀兩共補課額大段一
歲銀場所出不過三千有餘礦夫夫丁折辦乾認乃至

二萬八千餘兩加耗糜費倍之正德六年鎮守總兵官
黔國公沐崑巡按御史張羽以此會奏要將各場照依
福建等處封閉免辦以紓民困仰荷皇上特賜允俞三
四年間地方獲安生靈稱慶正德九年被瀾滄衛軍周
達妄行奏開旋復科擾害生侵欺弊出正德十三年前
巡撫都御史范鏞巡按御史唐龍以此又將災異感召
情節建議封閉該部議擬覆題未蒙俞旨本年該鎮守
太監史泰奏乞專任提督以來查得礦夫口糧折辦銀

解布政司者先年因有麗江蒙化寧州浪穹等府州縣
遞年拖欠數多抵鑄之時恐誤解京那借在庫備邊等
項銀共二萬五千餘兩輾解至今未補夫丁乾認銀解
都司者遞年夫丁辦納不前官司追併緊急至於賣男
鬻女破產蕩家接輾補納又被經收人員耗取侵用軍
受橫征之苦國無完課之期緣雲南地方土號不毛物
產最少家無宿藏米穀極貴總計一歲之賦稅僅周一
歲之供給况邊徼易動夷情靡常事變無形兵糧當預

若使此地無此銀場朝廷決不以千數緡為贏縮而礦
夫得各回原衛操備則得軍一萬七千四百四名口糧
得令有司收積則得糧一萬八千七百五十六石夫丁
得免乾認銀一萬三千一百餘兩以備仰事俯育則得
各遂生理恩感昊天歡騰異域然則銀場一事閉者為
地方弭害其指甚夥開者為公家營利能得幾何以事
之利害言之閉者反足為利開者適足成害以利害之
多寡言之閉者所弭之害多而所喪之利寡開者所得

之利寡而所貽之害多此前此鎮守撫按所以踵陳封
閉之奏而該部具覆力主其說蓋酌寡量多惜大略小
體國者當如是也臣愚於是既知利害多寡之實今日
耳聞目擊益驗不誣敢不復為皇上言之皇上下之該
部備查詳議必有以驗臣之言為不誣矣或曰奉公行
法惟貴得人利無小而可棄害無大而不可去天下無
不可處之事財源無終可塞之理臣願乞將原撥軍充
礦夫一切查革各照原伍操備差使將原擬口糧亦各

免派行令各府州縣量徵折色通解布政使司聽作備
邊并營建宮室支用將九處銀場判山窩村廣運寶泉
四場先年因而礦脉除豁訖新興南安白塔白崖黃礦
五場查照近規鎮守衙門行令三司掌印等官於各府
州選委廉慎勤能佐貳官場各一員管領人工採挖砂
礦辦納國課若原開峒口礦脉衰微不勾辦納聽令查
勘附近新開處所一體採挖衰微處或少不足發旺處
或當有餘雖難拘定額數務要儘數納解庶上收天然

自有之利下免王者取盈之害如各委官敢有侵欺科
擾隱匿借貸夤緣交通情弊該道守巡官訪察拘提叅
呈究治罪犯甚者奏聞區處實此地興利除害之一大
事也臣不勝拳拳伏冀聖明垂憫遐荒幸甚緣係議處
國課以安邊民事理未敢擅便為此具本差承差陳起
鵬親齎謹題請旨正德十四年五月十五日

保襲祖爵疏

題為保襲祖爵鎮守地方事據雲南等處承宣布政使

司呈准本司掌印右布政使許淳咨准本司咨奉臣批
據雲南左等六衛指揮千百戶鎮撫等官申鎧等雲南
府昆明縣儒學生員紀崇儒等軍民舍餘里老董曦等
各連名呈告前事批仰布政司會都按二司查議呈報
奉此行准雲南都司咨查得今故鎮守雲南總兵官黔
國公沐崑五世祖沐英累從太祖高皇帝征伐功封西
平侯洪武十四年奉命平定雲南就留鎮守故族高伯
祖沐春襲爵鎮守故無嗣沐晟以弟襲爵鎮守永樂四

年平定交趾功封黔國公故族曾伯祖沐斌襲爵鎮守
故族叔祖沐琮襲爵鎮守故無嗣沐崑係族姪孫襲爵
鎮守今正德十四年六月十八日病故沐紹勛係嫡長
親男應該承襲公爵等因到司會同雲南都司都指揮
使劉宗仁按察司副使史良佐等看得各呈告情詞內
稱雲南僻在遐荒少沾王化蠻夷習性易動難安自洪
武年間西平侯克復之後奉命鎮守繼世平定交趾進
黔國公賜給誥券子孫世襲沐琮襲爵鎮守因故無嗣

沐崑係伊姪孫彼時雲南闔境土流官舍夷羅軍民告保奏奉欽依承襲公爵就彼掛印鎮守至今二十餘年地方寧晏軍民信服今既病故伊嫡長親男沐紹勛見年一十六歲讀書知禮乞照弘治九年黔國公沐琮病故保襲沐崑事例議奏留鎮以安地方一節具見人心有繫物望允歸況沐紹勛係沐崑嫡長親男別無違礙應該承襲合無采衆人告保情詞仍查先年承襲事例代為奏請就彼襲爵鎮守便益等因備呈到臣案照先

為前事已經批行查議去後今據前因會同鎮守雲南
并金齒騰衝等處地方兼提督銀場內官監太監史泰
巡按雲南監察御史萬鎡議得牧帥之臣民之司命沐
氏父子今歷六代留鎮雲南最久雲南地方凡數千里
仰知沐氏最深蓋其家聲足以彈壓蠻夷其勛舊足以
撫綏邊徼九重之腹心不容輕寄一道之鎖鑰必擇攸
司然則列聖於沐氏特令繼世鎮守雲南而先皇於沐
崑又令就彼承襲公爵廟謨深遠睿眷優隆朝廷收久

任之功荒服受永安之福蓋有在也沐紹勛係沐崑長
子夫人樊氏所出年未及冠衆皆曰賢今日之事父亡
子繼國朝恩典豈俟臣言而闔境土流官舍夷羅軍民
生員里老人等衆口一詞赴臣告保既經三司官查議
呈報不敢緘默代為奏請伏乞聖明裁處地方幸甚緣
係保襲祖爵鎮守地方事理未敢擅便為此具本差舍
人吳金親齎謹題請旨正德十四年七月初二日

地方疏

題為地方事准兵部咨該本部題職方清吏司案呈奉
本部送兵科抄出鎮守雲南總兵官征南將軍太子太
傅黔國公沐崑等題據臨安府申據建水州申據河底
等寨里長阿者等狀告有祖相繼守把交南隘口後有
交南管下土舍刀祝前來本州該管大判山鄉河底大
小五邦寨侵占住坐告蒙差官趕散到今正德十二年
內被伊孫刀蘭倚惡勢衆領帶交人復來起蓋樓房數
十間築打土城約有五里時常領人各帶器械科害良

民及據臨安府納更山巡檢司申稱被火頭李石草將該管大小五邦二寨并蒙自縣地名五邦衝阿愛夷苴鄭冲三寨地方廣受金銀棋沉等香盜賣與寧遠州土舍刀蘭招集交人在彼住蓋九架大樓築砌土城排柵深溝又占本司蠻貼等二十餘寨刀蘭專聽李石草并逃民張福榮唆撥聚調交人過界暗殺果桶寨抄搶人財及令人分投齋報雞毛木刻上寫本司大小村寨若不順從定在日下統兵殺害望差官軍調集附近土官

土舍勇夫人等擒拿解官等因節行據守巡該道兵備等官吳便等呈將委官前去撫諭刀蘭等不服緣由勘報前來議照安南國夷人刀蘭等越境侵占臨安府所屬五邦等寨地方起蓋樓房築立土城擾害邊民甚至殺虜人財抗違撫諭情罪深重法當殄除案行分守分巡兵備等官吳便等前往臨安地方督同府衛官員措置糧餉并行撥去守備及沿邊衙門官軍土兵嚴加操練防守關隘振揚威聲仍調臨安所屬附近土兵行委

的當漢土官舍人等統領前去相應去處駐劄先將朝廷恩威及逆順禍福曉諭刀蘭刀謹刀貢等并我境脅從夷民令將殺搶果桶寨人財并殺死蒙自縣皂隸張英等及拖欠糧差并逃民張福榮等逐一查處應賠償者依俗賠償應退還者照數退還并將拖欠糧差交官送出張福榮等治罪不許仍在我境占住各寨速回彼國保全軀命若刀蘭等不聽撫諭或敢抗拒我軍即宜添調官兵星馳呈報相機擒勦候事寧之日并查原設

巡河并箇舊哨堡官軍草去緣由即今應否照舊添設
通行呈報等因各具本題奉聖旨該部知道欽此欽遵
通抄送司看得奏稱安南國夷人刀蘭等越境侵占臨
安府所屬五邦等寨起蓋樓房築立土城殺虜人財擾
害邊民等情已經各官會議行委守巡等官前去撫諭
相機擒剿別難定奪况雲南去京師萬里邊夷事情尤
難遙制合無本部行文鎮守等官黔國公沐崑等會同
三司官從長計議隨宜撫剿惟在邊境保固豐隙不生

斯副委託如或處置乖方致惹邊患咎必有歸將議處
過事宜及地方有無寧息緣由具奏查考等因題奉聖
旨是欽此欽遵備咨會行鎮守太監三司等官一體欽
遵施行等因到臣案照先為前事該前巡撫雲南右副
都御史范鏞會本具題去後續據整飭臨安兵備帶管
臨元道雲南按察司副使吳便呈會同分守本道左叅
政朱應登行據臨安府牒呈行准本府掌印知府朱琉
關會同臨安衛指揮孫璽調取建水阿迷二州納樓長

官司等處及借撥臨安衛旗銃鼓手等共二千五百名
行令土官副長官普銓帶領本部下兵一千名為前哨
通判李宥千戶侯璋帶領五百名為左哨吏目王徵百
戶孫銳帶領五百名為右哨職同孫璽領五百名為後
哨於正德十三年十二月初一日起程前去撫諭本月
初三日到於河底阿土寨傍駐劄差據本寨火頭刀板
同應捕老人趙仕良等探得刀蘭將五邦左近隴墩蠻
昧等寨黑脚夷民聚集五邦要行抗拒不服聽撫各職

會議得阿土寨離五邦尚有三十里遠且在河外敵情難以遙測即於初四日移兵於五邦對過阿邦寨下阻河筈營差據阿邦寨火頭刀供探得刀蘭望見官軍衆盛畏懼帶領黑脚百餘駕船十隻夜遁五邦城內夷民俱各逃躲初五日遣趙仕良等帶領兵夫追至蠻引等寨各寨堅閉聲言刀蘭與刀貢等聚兵於蠻板欲回敵殺一場方去趙仕良等不敢前進又探得各寨夷民或四五十人或百十人俱披帶盔甲聚於山箐撫之不出

各職會議得非渡河則兵士芻糧無所資樓不可拆城不可平河外夷民亦不可服非兵多有援則河不可渡入調到土舍普顯兵一千名土舍龍星兵八百名於對河要害路口駐劄職等旋斫木植編成牌筏於初七日領兵渡河逼近五邦左右山頂劄營將刀蘭積下芻糧給散未支行糧兵夫以為久住之計然後遣李石草弟阿得同趙仕良等前去各山箐再四撫諭得原住五邦已故里長刀愠之姪刀甫等到職報稱刀蘭遣伊弟刀

謹潛來探得官軍復增與刀貢等帶領妻小并親信黑脚百十餘人從蠻板登陸路經懶枕寨去交南綏阜州尚有一日之程彼處山高箐大不知所止的處蠻板蠻引蠻貼等寨夷民俱各逃躲一空又差據龍星手下心腹人拐他等亦探報相同即每日分撥兵夫二千名將刀蘭所蓋大樓九間拆倒燒燬原築五里城牆盡行挖平城內但係黑脚所住房屋亦俱燒燬其蠻板寨原係刀貢所據蠻引寨係刀謹所據蠻貼寨係刀蘭妻所據

上下聯絡各有大樓排柵復遣老人趙仕良趙仕均李
質李仁等各領兵百名帶同刀甫前去將各寨樓柵一
一燒燬訖又遣熟識人前去招得刀蘭原占建水州蒙
自縣納更山等處各寨火頭六虎卜害伊泊等諭以逆
順禍福各給告示下帖照舊於原管衙門納糧當差不
得再聽刀蘭所立管寨即直科害又將刀甫立為五邦
寨火頭招撫本寨夷民復業仍禁約如遇刀蘭復來即
便傳報各寨併力驅逐出境毋得容留在寨居住及查

隴墩寨原係蒙自縣地方先為納更山土官巡檢龍震所占後為刀蘭所據亦給與告示下帖撥還本縣管轄其黨惡犯人張福榮先於十一月內聞得職等領兵前去撫諭懼罪自縊身死易銳表成俱逃伏山箐無憑拘獲職等要行發兵搜捕慮恐一時拒敵未免格殺反取妄殺之愆其劫殺果桶等人財并殺死皂隸張英等情刀蘭既逃無憑追究即今夷民俱已歸服及議得自今以後備禦巡河官軍民兵并箇舊哨堡相應復設庶使

夷民知警邊報易通各職欲要在彼久住更換火頭取
結回報但兵士多染瘴痢難以久住除領兵回還及差
趙仕良等在彼催取各寨火頭結狀另行等因備呈到
道續據臨安衛經歷司呈奉本衛案令准掌印指揮使
孫璽關同前事會同分守本道左叅政朱應登看得刀
蘭之先原係黑脚交人一種宣德初年潛入五邦地方
苦蓋草房取討年例其始不甚為害自寧遠州歸併交
南之後臨安府所屬建水州小判山鄉管下大小五邦

六呼僕刺等寨蒙自縣和泥里管下輒它輒玉等五寨
納更山巡檢司管下自大小蠻昧直底蠻王二十餘寨
各因僻處河外與綏阜州境壤相連援寡勢孤日見侵
削成化二十二年間刀蘭祖父刀祝占住蠻昧地方姦
收兄嫂南辦劫虜邊民男婦索取贖命銀兩起蓋樓居
虛張聲勢禁絕渡船阻遏邊報為惡多端該前都按二
司兵備副使劉肅都指揮陸卿議奉鎮巡衙門會案督
同指揮千百戶等官撫諭夷民驅逐首惡設誓講和追

認差發地方稍稍得寧但其委官人等止到大石洞口
未嘗一至河底及刀祝既遯之後其蠻昧所蓋樓房止
是撫諭火頭刀刺等自行拆毀未嘗一役兵夫是以河
外之民視交人如故有謂中國為寄寓致使刀蘭稔蹈
舊惡竊據地方橫征年例擅殺差人方且豎九架之樓
定居築五里之城自衛以致河內隴墩阿邦阿度等寨
俱各被其侵占逆其心志何但無將今知府朱琬指揮
孫璽克承委命奮勇直前倡率官兵徑趨河底既分布

各官會哨以為先登又動調普顯民兵以資後援故刀
蘭始則伏兵觀望尚懷覬覦之心繼乃駕船逃走陰奪
貪狼之魄然後旋捐木筏再渡河外散遣兵夫剗營山
頂拆其樓而火之為煨燼毀其城而平之為瓦礫動經
旬日遂克成功其一行支費則借助於石屏州賊賊之
羨餘其在彼芻糧則取給於刀蘭寨中之蓄積半月之
內所支行糧僅二百九十二石五斗刀蘭所居在五邦
伊叔刀貢在蠻板伊弟刀謹在蠻引伊妻在蠻貼各有

樓柵盡行燒毀蕩無遺植驅逐黠夷旋復境土所據各
官勞勩誠可嘉尚相應以禮獎勸其隨行通判李宥千
戶侯璋往來二次不憚勞煩吏目王徵百戶孫銳副長
官普銓土舍普顯應捕老人趙仕良等各能效力亦合
量加犒勞職等又查得先年兵備衙門因各寨地方隔
河寫遠設有巡河千戶二員每月輪流一員率領軍夫
巡視河底遇有交人在彼潛住就督令各寨夷民燒其
房屋驅之出境每遇月終仍取各寨不致隱瞞交人結

狀回報後因差去官員多不得人往往索取年例隨帶軍夫不能銓束又行擾害邊民弘治十五年間該前兵備副使王一言訪得前弊故將巡河官軍一旦裁革始雖為植禾除莠之圖終不免因噎廢食之弊所據前項巡河官軍相應復舊但須兵備衙門慎選的當勤謹官一員不拘指揮千戶責令量帶臨安衛操軍五十名不必每月一行但令每一季終務要親詣河底巡歷一遍冬春之交或二遍如遇刀蘭聚帶餘黨仍前入寇一面

督軍在彼防守地方一面飛報兵備衙門量調兵夫脅迫出境其隨帶軍人往回以十日為期俱各給與行糧務要嚴加約束不許似前騷擾村寨事發連坐以罪按季具結回報守巡兵備衙門查考一年滿日呈請別委相應官員交代庶地方有備事可責成再照臨安府大路九十里至倘甸倘甸七十里至箇舊村箇舊村七十里至它白由它白八十里至隴墩由隴墩徑趨河底則箇舊村正係軍民客商人等往來入河大路先年設有

軍民二哨每遇河外有警五邦等寨互相傳報聲勢相倚自巡河官既革之後前立哨堡無人控制客商私通交夷販賣禁物經過其下多被挾取謹然謂其不便尋亦廢置今軍哨年久漸就傾頽民哨僅存亦多逃散相應仍前修建合無仍行臨安府衛再行委官估計量工修理工完之日係軍哨者行該衛選委百戶一員摘發餘丁二十名係民哨者行蒙自縣編設總甲一名撥補民兵四十名各帶家口在彼住過常川哨守遇有河外

緊急聲息星火傳報仍禁約客商人等不許私下夷方
引惹邊釁巡河委官務要往來點閘內外應援中間有
在逃空役者聽其指名呈稟究治其隴墩一寨原係蒙
自縣地方與箇舊村他白阿邦阿度等寨相為聯絡自
往年納更山巡檢司土官龍震侵奪之後一向被刀蘭
占據今府衛委官既經查勘明白應合退還蒙自縣行
令僉取即苴二名管轄夷民辦納差使萬一刀蘭再行
過河擾害責令結約阿邦阿度火頭人等併力拒敵如

此庶河底居民易於協守河外聲息不難傳遞實為安
攘急務等因并原獲犯人李石草問擬充軍招由備呈
到臣查行間今准前因會同鎮守雲南并金齒騰衝等
處地方兼提督銀場內官監太監史泰巡按雲南監察
御史萬鎡議照刀蘭輩爾小夷偷生外國敢緣醜類窺
伺邊方仍襲頑兇恣為妖孽築城五里以固其穴豎樓
九架以侈其居肆掠遠近人財平吞善良村寨洎流弗
塞於捧土星火必至於燎原今兵備副使等官吳便等

委用知府等官朱疏等乃能盡心所事兵不血刃役不
貳時因敵之糧成我之勩遂致鴟鶚歛翼狼鼠潛踪灰
釘計窮飛走路絕樓燬城平而村寨為之完舊人歸業
復而地方為之獲安所據各官前項功勤委可嘉尚處
置各項事宜亦皆停安除將呈要賞勞獎勸及設立哨
守復撥巡河官軍發遣人犯等項俱依擬施行外緣係
該部題奉欽依將議處過事宜及地方有無寧息緣由
具奏查考事理為此具本差承差杜茂林親齎謹具題

知正德十四年七月二十四日

乞恩會捕疏

題為各省強賊往往越界劫搶大路鄉村殺死人民驚散百姓逃移負累糧差乞恩會捕起取逃民復業以靖地方等事准兵部咨該本部題職方清吏司案呈奉本部送兵科抄出鎮守雲南總兵官征南將軍太子太傅黔國公沐崑等題前事該本部看得奏稱擒獲過曲靖尋甸等處強賊阿空宰等俱問擬斬罪內者俄等俱照

例梟首示衆未獲安白阿卦阿尤董文剛等俱行緝拿
叅稱霑益州土官知州安慰幼穉無知貪害不檢內致
營火之猜疑外致賊衆之流劫雖稱已有後功終難盡
贖前罪指揮同知曹夢吉既叨掌印提督欠嚴又為女
壻巧文遮飾百戶劉玟賊至既欠防禦賊去又不追逐
安慰曹夢吉劉玟俱合有罪法當究問右叅議劉鶴年
僉事劉瓚各有守巡之寄指揮僉事陳勲金璽知府戴
鰲各有巡捕掌印之責地方有事俱難辭咎劉鶴年分

守之時正係者俄安慰搆讎之始首能建策運謀分散其衆又與劉璣督令安慰擒獲阿空宰以除首惡且劉璣戴熬陳勲金璽各能協同右布政使席書以成後功似俱可贖前罪又看得接管分守右布政使今陞福建左布政使席書計除方張之寇兩路獲安理釋積嫌之兵一州不擾貴州守備署都指揮僉事楊仁生擒首惡以報隣封席書楊仁前項微功俱似可錄被殺副千戶徐宗生前勇固可嘉死後忠尤可憫量加卹典以為死

忠之勸席書楊仁量加犒勞用嘉有功及將安慰曹夢
吉劉玟行提到官各問應得罪名照例發落劉鶴年劉
璜戴鰲陳勲金璽姑准以功贖罪惟復一體提問等因
既該雲南鎮巡官沐崑等會議具奏合無本部移咨都
察院行巡按御史將阿空宰等再審無異就彼凌遲梟
首示衆及將土官知州安慰平夷衛掌印指揮曹夢吉
百戶劉玟提問依律議擬照例發落叅議劉鶴年僉事
劉璜尋甸軍民府知府戴鰲曲靖衛指揮僉事陳勲雲

南中衛指揮僉事金璽雖稱有功似可贖罪但安白等
係首惡人犯尚未得獲難保必無後患合無行令各官
將安白等設法挨拿務要得獲及將地方事情用心撫
處再無失事具奏定奪及照分守右布政使席書貴州
守備署都指揮僉事楊仁既稱有功合無行移各該巡
撫都御史量加賞勞以示激勸及副千戶徐宗因平昔
捉賊讎恨被賊殺死亦行巡撫都御史徑自給賞優恤
其家等因題奉聖旨是阿空宰等著巡按御史再審無

異就彼處決梟首示衆安白等還著上緊設法挨拿務
要得獲安慰等提了問劉鶴年等准以功贖罪席書楊
仁既有功各依擬賞勞徐宗被賊殺害情可矜憫著給
賞優恤欽此備咨欽遵施行等因准此案照先為前事
該前巡撫雲南右副都御史范鏞會本已將者俄等招
罪及有功失事人員并撫處緣由具題去後本官緣事
赴京未獲人犯行拿未報該臣接管催據雲南按察司
分巡安普道呈稱已將賊首安白阿卦阿尤董文剛捕

獲問擬安白阿卦阿尤強盜得財董文剛共謀者分贓而不行俱斬罪決不待時具招呈該巡按雲南監察御史萬鎡詳允監候會審轉詳待報處決間安白阿尤在監病故委官相埋訖等因備呈在卷今准前因除阿空罕等并安慰等俱該巡按衙門徑自施行查覆劉鶴年等俱准以功贖罪席書楊仁應該各巡撫都御史量加賞勞外行據雲南布政使司呈稱平夷衛千戶徐宗被賊殺害奉有該部題准給賞優恤事理合無行曲靖府

查支在庫官銀并米給發收領等因到臣批仰於曲靖府支在庫銀一十六兩八錢內一兩八錢折鈔六百貫五兩折綵段一表裏作給賞之數十兩并米四石作優恤之數俱付千戶徐宗家屬收領取具領狀回報間續據雲南布按二司守巡安普道呈稱曲靖地方路當衝要先年因劇賊安白聚衆搶奪人不聊生自擒獲之後夷民知警道路疏通客商解截掠之憂村落無劫殺之苦盜賊頗息地方稍寧等因到臣會同鎮守雲南并金

齒騰衝等處地方兼提督銀場內官監太監史泰巡按雲南監察御史萬鎡議照安白等今既拿獲前項地方比舊委頗寧靖別無騷擾但阿尤等尚未得獲除仍行該道官行令曲靖等府衛宣布德威嚴加戒諭安白等附近各該村寨人民不許似前為非及責令土官知州安慰用心巡邏設法緝拿阿尤等解問以安地方不許仍蹈覆轍故縱殃民外緣係該部議行將安白等挨拿并將地方事情撫處再無失事具奏定奪及節該題奉

欽依是阿空宰等著巡按御史再審無異就彼處決梟
首示衆安白等還著上緊設法挨拿務要得獲安慰等
提了問劉鶴年等准以功贖罪席書楊仁既有功各依
擬賞勞徐宗被賊殺害情可矜憫著給賞優恤事理為
此具本差承差杜茂林親齎謹具題知正德十四年七
月二十四日

急救生靈疏

題為急救生靈以安地方事准兵部咨該本部題職方

清吏司案呈奉本部送兵科抄出巡撫雲南右副都御史范鏞奏前事該本部議得自古聖王治世詳內略外故漢武帝棄珠厓光武謝絕西域皆此意也我朝稽古定制窮邊要荒皆設長官司以夷治夷姑示羈縻之意永樂間曾立交趾布政司旋復廢罷今安南長官司那代犯罪絕滅彼時鎮巡官昧于稽古輕改舊章易土官為千戶所又不盡心區處驟驅土著之兵遠徙炎荒之地人情不堪無所控訴事經三年未見完結給事中劉

洙言其不便而都御史范鏞等以為叅議劉鶴年等改
擬溝旁山崗築城必是地勢高爽官軍俱已稱便却又
奏稱軍餘吳友仁等告稱不便要改遷於蒙自縣旁則
是猶有拘執原案不見果斷之意且叅議劉鶴年等所
議止知安南長官司地方可以設所控制外夷不知安
南長官司地方原係夷地難於設所切緣此等更張事
情處置一不得宜不惟不得其用必致貽患地方誠有
如給事中劉洙所言者合無本部行文雲南鎮巡官不

必展轉委官徒具文移務要身任其事從長議處如果冷水溝旁山崗可以立所生理安便人情樂從就便依擬脩築安插文書到彼限半年以裏完畢具奏查考若是溝旁山崗與溝相離不遠利害無異人情仍不順願難以刑驅勢逼就便照依給事中劉洙所言於附近冷水溝地方相度衝要穩便高阜寬平之處興工修築定限安插回奏查考若人情不順事有難處別有長策星馳具奏定奪如或因循鹵莽不恤下情致有逃亡遺患

地方展轉推託經年不決聽彼處巡按御史訪察糾奏
罪有攸歸等因題奉聖旨是這改立軍所事宜還著鎮
巡官選委三司官各一員前去彼處再加審處務要停
當就行興工修築毋致遲誤欽此欽遵備咨前來該前
巡撫雲南右副都御史范鏞會同鎮巡等官案行雲南
都布按三司選委堂上官一員親詣勘處去後續據雲
南布政使司呈准本司右布政使席書咨會同整飭臨
安兵備副使吳便都指揮僉事劉璽親詣臨安府督同

掌印知府朱疏通判周京臨安衛掌印指揮僉事馮登
新安守禦千戶所正千戶樊陣蒙自縣署印縣丞蘓仁
等俱到蒙自縣冷水溝等處會勘得蒙自縣在臨安東
南一百六十五里縣東南二面俱與交趾相接彼此各
以大河上通元江下入蓮花灘即交人關口永樂宣德
年間大軍征取交趾道經蒙自進兵蓮花灘口後廢交
趾以安南長官司那代一支為交人捍蔽近年那代勦
滅鎮總撫巡案行三司等官議要調臨安衛中所官軍

在於響水河築城防禦隨行守巡等官看得響水河山勢嶮峻緣無築城之址冷水溝偏在西隅且非喉轄之地惟長官司賊路總會相應建所方將畫圖回報隨有所中旗軍羅受通等誤聞冷水溝地廣田多意圖便利指稱原係中所遺址願在此地築城開屯及稱長官司地無源泉不便等情呈蒙鎮巡奏奉欽依脩築間各軍號訴以為生理不便言官論列以為死地難居及至行勘或勘得蒙自縣西地名十八家可以隨處策應或勘

得冷水溝正係隘口相應在此築城以大勢言之蒙自縣除旁蹊小徑外道路達於河底其大者有三東路長官司中路冷水溝正入蒙自西路箐口分判村一支旁入蒙自與二路總會就三路論之東路長官司最要中路冷水溝次之西路箐口又次之今除西路外若專在冷水溝設立城所亦足抵當此路但東路長官司比與冷水溝尤為衝要不無有失防禦若移城長官司專一屯守此路冷水溝一路又似空虛內蒙自縣坐落川原

當東中二路正會西路旁會相應於三路緊關去處各設軍民哨堡各築煙火墩臺一遇有警蒙自城中隨處可通消息三路皆可策應地勢似利人心亦和等因呈詳到院批行布政司分守臨元道官會同分巡該道及臨安兵備等官查勘去後該臣接管催據整飭臨安兵備帶管臨元道雲南按察司副使吳便呈會同分守本道左叅政朱應登親詣普瓦寨冷水溝等處地方看得先年交人背叛之後設立安南長官司控據襟喉阻塞

隘口此誠要衝之地封疆之守宜莫急於此也正德八年因那代不法自取滅亡該前守巡兵備等官議得前項地方切隣交趾應合防守但因師旅之後夷民俱各逃亡所遺軍民田土止有三千餘畝地寡人稀不堪設立縣治相應改設千戶所在彼守禦沿關本司該都布按三司議呈鎮巡衙門奏行兵部題奉欽依准將長官司改設新安守禦千戶所修築城堡建立衙門將臨安衛中所全所官軍摘撥在彼常川防守已為定規後因

委官相度築城形勢或謂長官司山峻地窄不通源泉
難以立所因此改議冷水溝地方議者亦謂其偏在西
隅不係防禦喉轄之地止因其地頗寬平軍堪棲止姑
為遷就順從之圖未嘗信斯言為必可行據斯地為必
可守也職等承委前來督同臨安府衛掌印知府朱琬
指揮孫爾盡官操指揮李導署蒙自縣事知縣項美新安
所千戶樊陣等帶領熟知地利屯老人等親詣前項地
方委曲諮訪少得其詳蓋臨安府大路至蒙自縣一百

六十里由蒙自縣入交南其路有三縣東三十三里至李海寨十五里入長官司三十里至曲村四十五里至小窩則五十五里至阿克骨四十里至祁棲驛三十里至阿母干臘五十里入蓮花灘近年委官往來河底築立封堆必經於此此入河之東路也縣南十五里至松林哨二十五里至冷水溝七十里至花丈驛二十里至曲白四十里至綠水河先年設有交趾布政司人多經此今則山箐榛莽人馬難行此入河之中路也縣西南

三十里至鸚鵡塘三十里至判村二十五里至箐口巡檢司六十里至汪亮橋五里入清水河隔河為界則蠻勒攬枕地方正係刀蘭所居近年客商私販禁物潛地往來必經於此此入河之西路也然三路總會之地皆達於蒙自縣前該右布政使等官席書等會議於蒙自縣共築一城軍民雜處冷水溝小窩則鸚鵡塘各立一哨彼此救援不為無見但蒙自土民習於鄙野視城役如負山謂軍來為厲已自分彼此堅執不從或訛言冷

水溝係築城舊基或妄指花丈驛為入河總路上下喧騰聳動羣聽上司少不加察誤信其說鮮不以為實然若使熟知蹊徑之人略加窮詰便無一語可答今以事理揆之目下軍民之心既不相投它日爭訟之端必由茲起況同處一城勢難角力萬一交人入寇終之後援不可不慮職等又細以三路較之惟長官司最為要害其次則冷水溝其次則鸚鵡塘而普瓦寨地方尤係長官司出路先年那代定居於此遺址見存土地平行

可以負山而居溝壑縈紆可以順流而汲前議者謂長
官司山嶮地窄不可以城必此說也使其可城則那代
當先居之矣況戍守以屯田為要軍士以足食為先昔
漢趙充國議留兵分屯要害孔明屯五丈原謂其且耕
且守用此道也今查新安千戶所該撥屯田一百六十
七分其在響水河阿三李海曲葱等處附近普瓦寨者
共九十九分在小窩則者一十五分若使築城於此守
禦之軍出城而耕入城而守為便尤甚其冷水溝止有

田三十分龍潭寨近冷水溝有田三分花丈驛有田二十分兼且山寒地瘠用力艱難所以人心不肯樂從實由於此設若普瓦寨築城之後更於冷水溝立一哨撥與七分領田軍相兼住種鸚鵡塘立一哨撥與三分食糧軍在彼防守就將各軍名下餘丁貼備幫助不必再行差撥無事則各安生理有警則互相策應既有新安所為之外藩又有蒙自縣為之內應庶驅兵而歸之農固內而捍乎外人心必至樂從地方可保無虞矣呈奉

鎮巡衙門批行布政使司會同都按二司官看得各官親詣地方諮訪衆論俱稱普瓦寨地方原係那代舊基地勢寬平堪以築城立所及將冷水溝鸚鵡塘各立一哨就將附近屯田撥給住種防守委的事體穩便人心樂從合無備行守巡兵備官員取具該所官軍甘結繳報就便查照原擬行各委官擇日興工修築定限安插具由回報中間若有計處未周事宜亦聽各官臨期會呈詳奪等因到臣行據整飭兵備副使吳便呈行據委

官臨安府衛通判周京指揮王臣呈稱各職率同新安
守禦千戶所官軍并諳曉地里驛丞夏俊等親詣普瓦
寨相看得本地原係那代公祖住居舊址地勢寬平周
圍二百一十丈東西各六十丈南四十丈北五十丈蓋
造城樓三座內所基周圍二十二丈起蓋大門三間後
廳三間左右廂房各一間千百戶鎮撫二十七員公廨
地基每員門面濶二丈深五丈五尺三分旗幼軍共二
百四十四名該營房二百四十四間每名門面濶一丈

一尺深四丈前後正街偏街共八條其南門外見有屯
軍住居北門外原踏與屯軍田畝亦堪安住屯軍舍餘
各職研審舉所官軍衆稱利便樂從等因回報前來會
同鎮守雲南并金齒騰衝等處地方兼提督銀場內官
監太監史泰巡按雲南監察御史萬鎡議照臨安府前
項地方實係夷夏分界去處築城設所撥軍置屯防禦
貴當要害計慮須圖久遠一有差跌貽害匪輕先年委
勘官員因各未曾親詣地方逐一相視嶮易或聽一人

偏見或任一已私意此是彼非甲可乙否何異索駿圖
內築舍道旁動隔歲年訖無定議致煩部檄重行查處
今該兵備等官吳便等親詣蒙自縣冷水溝等處踏勘
得前項三路惟長官司最為要害其次則冷水溝又次
則鸚鵡塘而普瓦寨地方尤係長官司出路年先那代
定居於此遺址見存土地平行可以負山而居溝壑縈
紆可以順流而汲且又田地相近若使築城於此守禦
之軍出城而耕入城而守為便尤甚一節查與先次勘

官所言長官司乃賊路總會相應建所之議大率相同
及查得普瓦寨田地比與冷水溝等處居多軍士既得
遂其耕種又得便於戍守人情地利兩不妨廢於此建
城再無別疑其稱要於冷水溝鸚鵡塘各立一哨就將
附近堪耕田地撥給住種防守揆之事體亦為相應除
行兵備副使吳便將踏勘過應該起蓋城樓公廨房屋
地址及設立哨守等項俱查照原擬興工修築定限安
插具由回報查考中間若有未盡事宜並聽再呈詳奪

仍嚴令官軍用心操練防守疆界彼此不許私相往來
交通貿易致招邊釁罪不輕貸外緣係節節該奉聖旨是
這改立軍所事宜還著鎮巡官選委三司官各一員前
去彼處再加審處務要停當就行興工修築毋致遲誤
事理為此具本差承差趙禎親齎謹具題知正德十四
年九月初六日

何文簡疏議卷四

欽定四庫全書

史部

何文簡疏議卷五

詳校官國子監司業_臣納麟

編修_臣裴謙覆勘

總校官庶吉士_臣何思鈞

校對官中書_臣李荃

謄錄監生_臣孫炯

欽定四庫全書

何文簡疏議卷五

明 何孟春 撰

強賊激變疏

題為強賊朋惡勢衆流劫鄉村殺戮人命構起邊禍奏
奉委官受屬偏枉激變地方等事准本院咨准刑部咨
准兵部咨該元江軍民府土官知府那端具本差通事
楊明奏前事該本部題稱查無先年奏行勘問緣由題
奉聖旨是這土官所奏事情着鎮守巡撫巡按等官會

同議處務要停當原委官員果有受財偏枉等項就提問叅究了來說欽此欽遵又該本部議得前項土官知府那端所奏情詞俱係干詞訟合無移咨刑部查議轉行雲南鎮巡等官會同議處等因題奉聖旨是欽此欽遵備咨轉行前來案照先據雲南等處提刑按察司呈據本司經歷司呈抄蒙巡按雲南監察御史張羽案驗奉都察院勘合劄付該元江軍民府已故土官知府那忠次男那璘妻封氏嫡羅具狀令義男那阿道抱赴登聞鼓

下訴為奸雄弄權撥置土官朋謀調兵抄殺祖母屠危
宗族支解人命虜掠良民輕視國典大肆縱橫違法等
事備劄查照先今事理會同鎮守等官通行查提各奏
訴緊關人卷勘問歸結奏請發落等因備行守巡談道
勘問及備呈前巡撫雲南右副都御史顧源照驗在卷
續據該府土舍那受妻封氏孀閭告稱伊姪知府那端
調領象馬圍困祖寨將他刺五十餘家盡行抄殺房屋
燒燬等情節經行據雲南布政使司呈委雲南後衛指

揮僉事陳經廣西府通判周憲前去該府會勘又據喃
悶并伊男那仙訴被陳經周憲得受那端金銀象牙犀
角等物將夫男殺虜地方殘破等情又經行據本司會
同雲南都按二司議照那受與那端叔姪忿爭其曲直
是非必有至當之論今周憲陳經擅調兵夫攻殺那受
各官專殺之罪受賄之情亦不可宥備呈前來案行守
巡洱海道督委尋甸臨安二府知府戴鰲黃翱押帶陳
經周憲親詣該府勘報及經會本具題外續據雲南按

察司呈准洱海道關據戴鰲等呈稱委勘前項事情所有陳經周憲得受那端金銀等物緣陳經未蒙發下況與周憲那端俱係職官難以訊審等因行據雲南布政使司呈會同都按二司議得土官知府那端與土舍那受等叔姪爭論止是委官勘斷情罪並無擒勦文移陳經周憲却乃不照原行調兵殺虜況那端正與那受訐告縱使那受罪在必誅中間擅調受賄之情法難輕貸必得方面官員押帶各官親詣彼處會勘方可完結等

因又諫前巡撫都御史王懋中具題去後續准本院咨
諫本院題稱看得叅奏陳經前項事情關係非輕律合
提究欲仍咨本官將陳經行提到官追問明白查照律
例議擬奏請施行等因題奉聖旨是欽此欽遵備咨前
來行間又准本院咨談元江軍民府土官知府那端具
本差通事楊祐奏為強賊朋惡勢衆流劫鄉村殺戮人
命構啟邊禍等事該本院看得那端所奏緣係地方夷
情移咨煩為會同鎮守等官查勘具奏定奪等因准此

該前巡撫都御史范鏞會同鎮守等官議照土官知府
那端所奏情詞查與土舍那禧親族舅翁封氏嫡羅封
先及已死那受妻男嫡悶那仙并白士斌等各奏告情
詞事干一連併行都布按三司轉行守巡該道右叅議
等官劉鶴年等帶同知府等官戴鰲等前去該府查弔
干審人卷撫提勘斷續據右叅議等官劉鶴年等呈稱
依奉親詣該府地方散拘知府那端并撫提那禧及應
審目把人等到官將前項各奏詞內殺死人命搶奪人

口財物牛馬等項一一講斷應賠償者令其賠償應追給者令其追給具由回報到院查行間又據雲南按察司呈據經歷司呈抄蒙巡按雲南監察御史唐龍案驗奉都察院勘合劄付該元江軍民府被殺土舍那受妻封氏具本令義男那阿三抱奏為豪惡土官妄憑蠻例剪滅宗親輕視國典吞嗜無厭將來不軌等事又談本府土舍那禧具本令義男阿永抱奏為悖逆土官聽憑惡橫行誅殺謀害宗枝將翁斬首支解違法等事雲南

後衛指揮僉事陳經奏為陳情乞恩辯明誣賊久禁坐
害冤苦等事廣西府通判周憲奏為陳情乞恩矜錄勞
績明治冒功分辯捐身効死撫夷官員反行誣陷前程
久禁等事俱行該道守巡兵備官勘問及備呈本院查
照間節准兵部咨該元江軍民府因遠羅必甸長官司
土官副長官白琥等奏為言宿弊除叛惡靖地方以蘇
民困事本府儒學教授李相等奏為陳時弊辨冤枉弭
邊患以安地方事續准本院咨該元江軍民府已故土

舍那玟妻封氏媼先具本令家人阿你抱奏為忤逆賊婦吞併地方違法等事移咨到院會行各司轉行勘問處斷間令准前因又經前巡撫都御史范鏞會行各該守巡兵備等官親詣撫處去後未報該臣接管催據整飭臨安兵備帶管臨元道雲南按察司副使吳便呈會同分守本道左叅政朱應登行據臨安府知府朱琉臨安衛指揮僉事馮登將審勘過人犯刀倫即刀中成等似招供詞呈報到職會同接管分守本道左叅議羅方

提取各犯到官問得刀中成招係元江軍民府土官知府那端下頭目先年本府已故土官知府那忠娶故妻封氏生故男土官知府那璠又娶妾李氏等生故男那璘那玟那珩那英等那璠娶故妻封氏嫡當生故長男那祿并今在次男那禧那玟生今被殺那受已故那相在官那旺那祿娶未到頭目封哀璽即封愛璽故姐封氏嫡燕即嫡板生故男那靖并今在散拘土官知府那端那璠存日將地名南馬者忻瓦迦道阿肆鄉撥與那

璘甘莊他刻等處村田撥與那玟末龍罷蒿等寨撥與
那瑛他郎因遠伍寨及小娘南沔檳榔園撥與那禧各
令管業比時議定自後遇有絕枝者將莊田送歸做官
子孫免其爭亂以為定規那瑛病故遺下末龍罷蒿等
寨伊今在妾趙氏將罷蒿寨典當銀兩使用成化年間
中成已被殺父刀匪與被殺叔刀粉共用工開墾得地
名必朔寨田地一衝告報本府起科秋糧六十七石遞
年辦納不缺成化十年刀匪刀粉互相爭占前田被刀

粉將父刀匪殺死比時中成與故兄刀中旺各因年幼不能理論那璘娶故妻封氏嫡羅生故男那昂那昇那晟將南馬肆鄉村田分居那昂生故男那銓後那璘那昂父子繼故將南馬四鄉村田遺與那昇那晟那全叔姪比時那全年幼財產俱是那昇那晟掌管後那璘病故那祿護印聽襲與那禧弟兄爭奪因遠五寨地方互相訐奏蒙委官勘斷仍撥與那禧照舊管業弘治十年那祿病故那靖襲職娶今在散拘土官副長官白琥未

到女白氏為妻那禧見那靖幼小不合就照土俗收嫂
封氏孀板為妾隨同在府住過扶助那靖行事次年生
女一口名召罕先弘治十三年刀中旺與中成長大思
起父刀匪被叔刀粉殺死無辜不合朋謀亦將刀粉殺
死被伊妻孀粉具告撫按衙門委官撫勘中成又不合
與刀中旺各懼罪逃躲委官將孀粉安插必朔寨居住
回報訖弘治十四年因貴州叛賊米魯作亂蒙調本府
官軍前去征勦該那瑛妾趙氏所管末龍寨朋出兵夫

四十名趙氏不肯出備致累頭目封愛璽自行顧倩前去後班師回還告蒙委官追斷趙氏將末龍寨准作封愛璽倩軍之需仍令封愛璽出銀三百兩贖回原日趙氏出典與人罷蒿寨與趙氏母子管業本年那昇那晟亦故各絕嗣家財仍是二人未到妻封氏嫡車收管比有南馬等寨通把人等將那全接取到寨扶助管辦糧差因那全幼懦不立却將南馬寨管下小寨地名道阿瓦迦二處獻與那玖又將南馬大寨并者忻小寨獻與那

禧因而投靠那禧為男那禧就與那全聘娶祿蓬寨未到火頭羅確今故妻羅氏為妻後那靖病故無嗣那端襲職亦娶封愛璽未到女嫡罕為妻封愛璽隨女在府住坐比有未到生員李長春舍人魏海脫逃老吏楊傑流民楊士連劉道明劉山四各不合與今故趙教各故連雲貴等處但有漢人交結夷人引惹邊釁潛住苗寨教誘為亂貽患地方者俱問發邊衛永遠充軍事例李長春魏海趙教楊傑撥置那端楊士連劉道明劉山四

撥置那禧各成怨恨互相讎殺那禧恐被那端暗害潛回他郎寨居住一向不與原姦收嫂媼板往來弘治十八年那全因患水腫羅氏亦因生產各病故絕嗣所遺財物俱被羅氏未到母封氏收回祿蓬寨去訖其南馬四鄉村田那禧同本府頭目把事人等照依原議絕枝田地俱送與那端管業刀中旺亦因時疫病故正德元年那玟今在妾媼先男那相年方七歲病故媼先疑是已故妾白氏媼當男刀旺即那旺用藥毒死媼先一向

懷恨在心正德二年三月內那玟要奪南馬村寨商同已被殺男那受并今故召霸白珩即白亨等借調他郎夷兵三百餘人各帶盔甲器械騎坐象馬擁入南馬寨將人民家財牛馬乘機殺搶奪占本月初八日等日白亨等又到虧老等寨圍困當有本寨未到民集作阿永阿甸阿車先等密報知府那端差白琥等前來退兵那玟不從那端又央那禧解散伊不合坐視不理彼此各愈成讎本年九月二十日那端毋嫡板前去瓦迦寨收租

種蒜那玟得知使令白亨并未到哀麻等要將嫡板截殺比有跟隨嫡板今故召霸宋寧等向前對敵哀麻不合將嫡板臥轎砍碎殺死轎夫阿輪使女阿業并各身帶金銀首飾器皿盡行混搶去訖那端得知隨差封愛璽帶領兵夫象馬前來與白亨等對敵各退封愛璽等領兵回府將情條由通呈鎮巡衙門會行布政司行委指揮張鎰知州何子奇到府體勘那玟白亨那受各又抗拒不服出官本年十一月內那玟又令白亨奪占哈桑

管下沼鐵等五寨殺死村民阿鬼阿章阿且捉虜阿折
等并牛馬豬羊等物又攻地名南洞寨殺死寨民光父
等致被本寨未到頭目刀丙刀悶刀車刀卯向前對敵
將那玟侄孫封彪阿先摩先刀愛家人阿腫格殺身死
刀丙令未到民光愛等告府那端又不合令封愛璽不
合依聽將那玟原置買新化州嶧峨縣私莊南晏壩江
等村寨并那禧所管地名小堰南沔二處檳榔園奪占
及燒燬嶧峨縣私莊房屋六間那禧又不合將那端所

管車夫能邦卜永孔等六十八寨奪占正德三年三月
內那旺與那受不睦又怕嫡先尋害隱情投往那端處
倚住本年五月內那玟在家病故未曾埋塋封愛壘思
起白亨等久占南馬村田要行奪殺比趙教楊傑魏海
李長春未到夷民張輔李平何全張永昂楊昆玉李孟
堅頭目刀兵刀勒張府封車封蘭跟隨那端明知地方
擾攘各不合不行勸阻那端又不合令封愛壘亦不合
帶領夷兵前去圍困將白亨手下男婦殺虜五十名口

未退嫡先告蒙巡按周御史節委指揮等官張鎧等前來各寨會勘撫拘那禧那受那端封爰壘白亨到官面審各亦輸服責令那禧等照依土俗講和仍将那璘分管南馬絕枝田地并那禧原占那端邦卜永孔等六十八寨俱退歸知府那端管業那玟置買新化州嶧峨縣南戛壩江等處田地退與那玟妾嫡先管業那端原占小壩南沔村田并檳榔園亦退與那禧管業訖仍令那受出備馬二匹牛三隻銀三十兩那禧出備牛一隻馬

一匹銀三十兩俱與那端母嫡板陪禮及將虜去人口
追給各親完娶殺死人命抄搶財物等項俱依土俗陪
償仍令各立合同明白取具那禧等退領供給在官各
問罪罰穀通呈鎮巡衙門詳允行府追穀各不曾上納
後那受又備馬二匹鞍一副牛二隻銀六十兩央浼未
到族婦陸氏赴府行禮外結和好內藏忿恨暗令嫡先
出名亦不合聽從捩稱那端使人將那全夫婦毒死領
兵將財產一搶無餘那端同封愛璽等與那旺領兵前

來甘莊攻燒房屋有夫那玳奔命那旺追赶戳死等項
虛詞混將那璉那祿等先年奪占田土已經斷明事情
具狀令姪阿小於正德四年間抱赴登聞鼓下奏行都
察院勘合劄行巡按羅御史轉行三司會勘蒙陳叅議
等官親詣本府撫拘知府那端并那禧那受封氏白亨
嫡先封愛壘及知因白琥等到官面審各相情願輸供
蒙將甘莊并本府管下隣近地名阿東那補達壩章孟
山坡補凹坡烈標哈糯白邦狹澗等十寨撥與那受嫡

先管業辦納糧差其南馬村寨田地仍歸那端管業封
愛壘白亨等殺死人命先經委官俱已陪償仍令那禧
那端那先衆證明白寫立合同取具那禧等供詞呈報
鎮巡衙門議得那禧與那受封愛壘白亨刀悶刀丙刀
奉等與那端前項情罪既該三司各官勘呈各將奪占
村寨殺虜人財先經照依土俗斷給陪償明白合將那
端等量為罰米贖罪那先等量情發落回奏間那禧雖
與那端板講和仍懷前讎亦不將那端母子往來管顧及

又不合將該退還本府邦卜永孔等六十八寨內地名
糯巴補幹甸直三寨占管正德五年正月內喃板不甘
將節年爭地讎殺已經勘斷舊事并添挽甘莊他剌二
處村寨被那受占恠不退殺虜人財未蒙斷給又被攻
府奪城等項虛情那端又不合挽稱那受擅將逐年秋
糧侵收製造軍器衣甲招集賊首普海等殺搶人財坐
地分贓等項虛情各具本奏行都察院勘合劄行巡按
羅御史轉行本道併勘本年二月內中成思得必朔寨

係是父叔刀匪刀粉共遺產業被孀母孀粉獨占不甘
要與奪取無計見得那端那禧那受互相訐奏中成意
欲乘便投靠那端做主報復那禧等私讎將必朔寨爭
回管業就不合聽信那端主使捫稱那禧擅調夷兵攻
打府治抄搶村寨霸占地方斬首自由與兄刀中旺打
話要買必朔寨不允發怒統兵殺死良民擄去男婦等
項虛情具本奏行都察院勘合劄行巡按羅御史案行
本道勘問孀先聞知又不合將前斷過事情并添捫那

端自知情罪主令家兵困先母子阻絕糧食欲圖餓死
又要揀點夷兵前來先母子住坐甘莊并那禧所管他
郎地方盡要吞謀殺害絕滅枝裔等項虛情具本令光
唆抱赴登聞鼓下奏行都察院題奉欽依行移鎮巡衙
門轉行本府曉諭約束并將那端等所奏事情催勘未
結本月內那旺又不合將前項結斷舊事并添捏那受
見庶母嫡先生有姿色欺天背父暗與通姦恐父知覺
用藥毒死及南馬等處良民盡遭戮戮等項虛情具本

令男那阿倫奏行都察院劄行巡按羅御史會同鎮巡等官看得所奏與先奏行會勘緣由相同難再行勘備由案行本司轉行戒諭間那禧李長春魏海楊傑楊士連劉道明劉山四嫡先那旺張府李平何全張永昂刀兵刀勒張輔封車封蘭罪名俱遇蒙本年九月十八日赦宥李長春魏海楊傑楊士連劉道明劉山四各不合不行首正正德六年正月內那禧不合主使那璘妻封氏嫡羅替與那端報讎將前斷明舊事仍捏那端將孫

那全夫婦毒死又調夷兵象馬前到南馬分兵六營縱令黨惡刀斌等將百姓光你等綁縛開刀斬首所管人民家財牛馬穀米等件盡行搶擄等項虛情令義男那阿道抱奏那禧又不合將前斷明舊事并添捏那端浼託白琥等與禧言要將被殺叔那玟屍體主宰燒化涉虛講和所占南馬村寨又不退還日每演兵要行攻打甘莊并那禧他郎住寨意在絕滅一族等項虛情具本令義男那阿得抱奏俱行都察院勘合劄行巡按張御

史案行勘問本年六月內那端思得自行奏告那受等
恐上司不肯聽信要令小民告發又不合主使未到火
頭阿白阿賽先里各不合依聽捏稱那受督令賊兵殺
死村民抄搶牛馬家財等項虛情告府備呈撫按衙門
挨捕間那受得知却向已格殺封丙等商說被那端累
奏告我做賊搶刦如今我每大家左右刦殺他地方幾
場死也甘心封丙等聽允本月十五日那受就行帶領
封丙與已格殺封胖等家人關鮮等各披帶盔甲鎗刀

前到本府管下通凹鳩班村將本村未到民光里者哈等家牛馬豬羊家財等物盡行刦搶及又殺死民人巴乍等燒毀房屋回到本寨將財物均分費用牛馬豬羊陸續殺食無存比有委官指揮劉綱在彼勘事光里者哈等將情告報會同本府去任經歷顧洪勘實責令屍親將巴乍等身屍領埋及備呈鎮巡衙門挨捕間正德七年五月內本道將前項未結事情行委臨安府衛指揮龐松教授孔完親詣本府撫拘那受懼罪不出止拘

出那禧等各奏事內干審人証到官勘得那禧楠板那
旺楠先各奏事情委的止因那禧與楠板自從講和之
後各又情疎不相往來讎恨日深各遂拾掇舊事那禧
主使楠羅楠先那端主使楠板并那旺各報舊讎重復
誑奏是實蒙將那禧原占糯巴補幹甸苴三寨田地退
歸那端并楠板原占小堰田園退歸與那禧各收領管
食前項南馬甘莊因遠邦卜永孔等寨先經三司委官
斷撥明白仍令那禧出備銀五十兩紗段各二疋牛馬

各二隻匹送與媼板亦令媼板備銀十兩紗段各一疋
牛馬各一隻匹回與那禧各相和好收訖那璘妻媼羅
那玟妾媼先俱係那端嫡庶叔祖母那禧係那端親叔
那受係那端堂叔仍責令那端出備羊酒與各陪禮謝
罪戒諭各人洗心遷善再不許懷挾私忿構兵讎殺取
具那禧等重甘供結回報守巡本道行仰委官將那禧
等復取到官再加研審前情相同將那端所奏那受前
項縱賊抄搶等情并中成所奏緣由另行勘問將那禧

等問罪具招通呈鎮巡衙門具奏間本年六月內本道將前項未結事情仍行龐松孔完親詣本府撫拘勘問被那受生拘不出聽理止拘獲中成等到官審出中成謀殺叔刀粉情由將必朔寨斷令毋石氏與孀孀粉照依土俗盟誓講和各照舊共管辦納糧差蒙將中成問擬謀殺期親尊長已殺者凌遲處死决不待時又蒙看得中成原情蓋因爭占村寨被叔刀粉將父刀匪殺死中成弟兄方將刀粉殺死彼此人命兩相抵償將中成

查照死罪罰贖寧家具招呈蒙本道轉呈巡按張御史
呈詳都察院未示間婦粉不忿將前中成與刀中旺殺
死刀粉情由添捏刀中旺等黨惡封愛重等借倩夷兵
勇入寨內將夫刀粉弟刀瓊姪刀哀刀糯刀鳴併人伴
哀補等盡被殺死屍丟火中等項虛詞具狀令男刀三
抱赴登聞鼓下奏行都察院劄行巡按張御史備行本
道守巡官勘問正德八年正月內那受捏稱那端不遵
長幼主令撥置調領夷兵象馬將受甘莊園圍抄搶殺

虜燒毀房屋等項虛情令男那仙告蒙鎮守沐總兵官
批仰布政司會議間那禧又不合捏稱那端圖謀得襲
專聽封愛壘等撥置屠戮宗族奏蒙委官龐指揮等飽
受賄賂並不斷撥等項虛情具狀令義男阿容告蒙巡
撫洪都御史批行布政司會議得那禧又稱委官指揮
等官龐松等受屬偏斷難以再委將前後未結事情抄
詞改委雲南後衛今在官指揮僉事陳經廣西府今監
故通判周憲會勘間那端又不合主使未到夷民光里

白亦不合聽從捏稱那受帶領召壩封丙等前來本村
殺死寨民阿別等及搶去牛馬等項虛情具告本府通
申鎮巡衙門蒙巡撫洪都御史查將前項劉綱顧洪并
那端節申那受殺搶事情通併催行整飭臨安兵備今
故副使王昊查勘本年二月內那端又不合哄誘煽先
回府主使煽先不合依聽捏稱逆男那受故縱賊首召
壩封丙等殺死良民等項虛詞具狀今男阿你告蒙巡
按張御史批行本道通併抄詞行委陳經周憲各到元

江府撫拘那受不出那禧又不合將銀一十三兩二錢馬一匹幫助那受送與陳經周憲嫌少當將銀馬首送本府轉解兵備王副使處將馬發往臨安衛鎮撫變賣得時價銀六兩與前銀發該衛貯庫那受見賊入官商令封丙脅集各寨未到光先等男婦入寨起蓋敵樓擺列軍器晝夜防守楊傑李長春魏海嗔恨那受那禧節次告各撥置上文要得乘機報復各又不合與趙教各向那端唆說那受揚言待委官回後要構外夷奪占南

馬等處莫若趁此備些禮物賄屬委官動文書結果了他免得日後讎殺爭奪那端不合依聽於本年三月初八日將土產七成色銀二百兩銀壺二把重三十兩金臺盞二副銀酒盃二箇各重十兩令已被殺通事宋寧過送陳經亦不合故違文武職官索取土官夷人財物犯該徒三年以上者發邊衛充軍事例與周憲將前銀物枉法接受均分人已就行聽憑那端與封愛壘各不合起調夷兵豎立排柵圍困那受住寨被那受封丙等

在於敵樓上藏身發弩陸續射死領兵頭目封鵬等并
兵夫阿召等本年五月內陳經周憲見得殺死兵夫數
多方將調兵緣由具呈兵備副使王昊不行詳審來歷
輒差臨安衛千戶潘衡齎帶彩紅羊酒果品犒勞陳經
周憲陸續將脅從那受夷民先先等扶出安插原住地
名蔓東等村寨住種訖本月十三日那受見得圍困日
久食盡人散帶領關鮮等并封丙等通合刀胖等各執
槍刀兇器騎馬從本寨北門突出戰鬪殺死那端手下

刀壩哀兵夫者你等比那端下未到家人刀旺不合用
箭將那受左脇射傷墜馬封愛璽要得報功不合主使
刀旺亦不合依聽擅將那受斬取首級封丙等亦被兵
夫亂箭格殺身死那受所積金銀器皿牛馬羅段布疋
等件不知數目那端又不合主使封愛璽亦又不合依
聽盡行抄回分賞兵夫封愛璽亦又不合將那受已省
發女孀罕悶孀端家人阿教等共一十五名口捉回收
養仍將封丙等各斬取首級連那受共一十二顆具由

呈解兵備王副使審驗轉發梟掛仍備由通呈合干上
司訖那端又不合將甘莊寨田地占為己業比有那受
今在妻封氏嫡悶同伊男那仙在於省城告狀未回伊
未到家人阿哀阿三各潛身報與嫡悶那仙各不合不
行訪實將前情并已經斷明舊事牽搭在內添捏那端
同陳經周憲將夫并寨民召壩封丙等四百餘命殺死
陳經周憲又受那端金二百兩銀四千兩象牙犀角等
物將夫身屍抽腸支解等項虛詞混實告蒙鎮總撫按

衙門批行布政司會同都按二司掌印并該道守巡等
官查議間那禧要得幫助嫡悶子母又不合將斷明舊
事并扶嫡悶等前項虛實情詞具狀令義男阿鳩抱告
巡撫洪都御史處亦蒙批行布政司查將前後呈告事
情會同二司掌印并該道守巡等官議委尋甸臨安二
府知府戴鰲黃翱親詣甘莊寨撫勘間那端舅翁今在
封先因與那端讎恨不合將斷明舊事并混捏那端封
愛壘調兵將男封別支解斬首祭旗并扶嫡悶情詞具

狀令妻孀先抱赴本院告蒙批仰布政司併行委官戴
鰲黃翱勘出前情斷令那端令照依土俗贖備時銀三
百六十兩金廂寶鐲一雙重八兩七錢段一疋疋馬一
十匹牛一十隻給與孀問那先養贍仍具由通呈鎮巡
等衙門仍蒙批仰三司議行該道守巡官勘問具招開
詳間孀先孀粉那仙封先光里阿白阿賽光里白與李
長春等罪名俱遇蒙正德九年正月二十八日赦宥李
長春魏海楊傑楊士連劉道明劉山四各又與未到生

員王俸不合故違前例王俸與李長春魏海楊傑仍在
那端處楊士連劉道明劉山四仍在那禧處各教誘為
亂本年三月內嫡悶思得那端抄去家財數多陪償不
敷商同那禧封先各又不合仍將前項虛實情詞混開
被抄財物單目具狀令家人阿那鮮阿籠封阿賽抱赴
登聞鼓下具訴比有今在土舍白士斌不合商同嫡悶
那禧等亦要朋害那端將已經斷明舊事及扶嫡悶那
禧等虛實情詞并添捏白亨男白仕賢前去雲南買賣

那端暗使白玉探聽事情白仕賢將伊捉拏被其脫走
告稟那端發怒調兵燒毀房屋夷兵盡被殺死等項虛
詞具狀令義男白阿怒亦挹赴登聞鼓下與嫡悶等訴
詞俱奏行都察院勘合劄行巡按李御史備行本道守
巡官勘問正德十年正月內那禧又不合捏稱那端主
使封愛璽毒死那俊所管邦牛等寨給賞封愛璽管食
等項不實情詞令家人阿得挹赴登聞鼓下奏行都察
院劄行巡按李御史案行勘聞本年四月內今在土官

那福同母趙氏要得爭奪前項准與封愛壘末龍村寨
趙氏不合出名將已經斷明舊事及捏稱封愛壘欺氏
母子寡弱謀奪夫遺末龍大寨調兵殺死氏姪者刺孫
女嫡刺等搶去家財牛馬等項虛詞具狀告蒙巡按李
御史批行并勘未結正德十一年正月內蒙巡撫王都
御史具本將陳經叅奉欽依行提陳經與周憲監候間
本年七月內那禧管下因遠新村養魚水塘一箇亢旱
水乾無魚疑是今在民人董全張子才趙景段索偷食

要行懲究比有那禧下未到通事周暹民人趙添祿張文清郝四張思學各不合乘機教唆那禧未到通事刀者寺不合依聽追罰董全等銀五百兩因無湊備各不合逃投那端亦不合乘機令母嫡板隨帶董全等前去因遠安挿因而就彼占住監立排柵集兵防守李長春王俸各又不合撥置那端又不合主使董全張子才趙景段索各不合依聽添寫未到村民光得等在內混捏因那禧差令刀者寺等追罰銀兩全等各村人民只得

逃命等項虛實情詞告府通申間那禧聞知就不合捏稱那端悉憑封愛璽調兵圍殺因遠五寨等項虛詞具狀令妻男羅氏那宰松那罕徹及令伊管下火頭段勒各不合依聽陸續節行告赴鎮巡衙門批行會勘未結本年八月內通事李孟堅楊昆玉各不合撥置那端又不合將前項奏告申呈那受等虛實情詞及捏那禧主使楊士連等前後謀官奪職攻打府治殺死良民奪占地方絞死叔父那宗并尊長封風等又與叛賊刀三猛殺

死知府刀脩又將叔公封反等殺死封龍等取膽分屍
等項虛詞開單具本令通事楊佑抱齎奏行都察院咨
行巡撫范都御史轉行本道議委知府戴鰲推官王鏐
親詣元江府散拘那端并一千人卷到官研審那端又
不合隱下前項實情嫡悶等亦又不肯輸服戴鰲等再
行量情斷令那端又備時銀三百兩牛馬一十五隻匹
陪償嫡悶那仙回報間那端又不合將前斷過牛馬指
留不與嫡悶亦思陪償不敷復告本道改委指揮孫璽

與王鐫領押媢悶那仙前到甘莊寨安插仍取那端不致謀害結狀及再行勘理間王俸魏海各又不合教誘那端亦又不合聽從捏稱王鐫孫璽接受那禧金銀臺盞四副銀千百餘兩犀角象牙笏梳將所奏事情不行等項虛情具申鎮巡衙門批仰併勘正德十二年四月內媢悶慮恐那端殺害復回省城住坐又不合將前虛實情詞及牽掎已經斷明事情在內捏稱王昊與周憲鄉里親識又因知府黃翱好利當託生員人等厚賄黃

翽央伊與王昊屬行周憲將夫那受斬殺等項虛情具
本令義男那阿三奏行都察院劄行巡按唐御史轉行
勘問魏海楊傑又不合教誘那端又不合主使白琥亦
不合依聽將那受那禧前項為惡虛實情詞并將已經
斷明舊事牽掄又添捏那受將官兵阿筭賺去殺死及
扶那端前項誣申委官得受金銀等物各項虛情具本
及有本府儒學今在生員劉仕俊張銓徐貴趙玘姜秀
趙文泰楊得先沈榮曾鑾羅友質張倫張朝宗楊宣張

經楊伏秀馬汝節各不合要得回護那端將不干已事
一槩朦朧具呈本學今故教授字相輒便准信具本各
奏行都察院移咨巡撫范都御史勘問那禧又不合將
前項節次奏告虛實情詞具本令義男阿勇抱奏陳經
周憲要得分辯各又不合執稱虧枉亦具本令家屬陳
永才周升各抱奏行都察院劄行巡按唐御史勘問那
端又不合將前項節次奏告那受那禧等虛實情詞卷
案備細抄謄開款及捏委官戴鰲王鐫孫璽飽受那禧

等賄賂不行提勘等項虛情具本令通事楊明抱齋奏
行都察院備行撫按衙門會行勘問間正德十三年八
月內周憲在監病故相埋訖本年九月那仙封氏那禧
趙氏各又將前項虛實情詞訴蒙巡按萬御史批行布
政司催行本道分守朱叅政兵備帶管分巡吳副使行
委臨安府衛知府朱疏指揮馮登親詣元江府督併本
府經歷趙崧等拘將中成那禧等并散拘那端等呈解
前來連日逐一審勘前情明白致蒙照依土俗講斷除

知府戴鰲等二次斷給陪償婦悶之數外仍責令那端
出備時使七成銀六百六十八兩金盞二箇重四兩六
錢折時銀四十兩金寶絛環一箇金寶鐲一對共重一
十六兩五錢折時銀一百二十兩金茨鐲一對重二兩
折時銀二十兩銀臺盤二箇重七兩八錢折時銀一十
一兩銀壺二把重三十二兩折時銀五十兩段六十六
疋紗絹四疋共七十疋作時銀三百三十兩馬二十一
疋牛六隻作時銀二百六十一兩共該銀一千五百兩

給與媼悶那仙作陪償那受人命并家財不數之數媼悶亦因訐告年久未得歸結亦愿收領前銀養贍度日仍將甘莊大小村寨田地及追出封愛壘原捉回媼悶女媼罕悶媼端并家人阿教等共一十五名口退撥給還媼悶那仙收領管業又將罷蒿寨并近城感孟空地二處令那端另撥田一段給與趙氏并男那福照舊安插居住其因遠新村五寨小堰南沔桤榔園等處村寨田地俱退撥與那禧父子照舊管業南馬四鄉田地仍

照原斷給與那端管業出給印信下帖吐退木刻付各
執照仍差人將孀閼趙氏等送歸各分定寨分安挿俱
聽候發落外取具中成等歸一供詞回報本道會同提
取陳經與各覆審前情無異將那福省令土官那端白
琥省候及蒙查審得陳經前項情罪係干邊方夷情不
在宥免之例將中成等取問罪犯外結得銀每兩值鈔
八十貫金每兩值鈔四百貫招結是實二十九名口陳
經原籍直隸揚州府高郵州人始祖陳九一從軍相繼

高祖陳暉兒調雲南後衛左所故曾祖陳良補伍宣德
元年功陞小旗故祖陳順補景泰元年貴州等處有功
歷陞本所正千戶故父陳昱襲職老疾經替職弘治十
五年貴州普安等處功陞本衛指揮僉事那禧趙氏孀
先那旺孀悶那仙封先白士斌董全張子才趙景段索
劉士俊張銓徐貴趙玘楊伏秀姜秀張經趙文泰楊得
先沈榮楊先曾鑾羅友質張倫張朝宗馬汝節各招與
刀中成招同議得刀中成等所犯刀中成那禧封先孀

悶俱除草前媼悶陳經俱除奏事那禧除申訴各不實
輕罪俱不坐外刀中成合仍依原擬謀殺期親尊長已
殺者律凌遲處死決不待時陳經依官受財枉法有祿
人八十貫律絞係雜犯准徒五年趙氏若告封愛璽調
兵將姪者刺孫女媼刺殺死等情得實封愛璽合坐以
故死者斬今虛依誣告人死罪未決者律杖一百流三
千里那禧媼悶媼先那旺俱依奏事詐不以實者律
各杖一百徒三年封先白士斌俱依擊登聞鼓申訴而

不實者律各杖一百董金張子才趙景段索劉士俊張
銓徐貴趙玘姜秀趙文泰楊得先沈榮曾鑾羅友質張

倫張

闕一頁

欽定四庫全書

卷五

俱告紙劉士俊等一十六名俱官紙各一分折
穀各五斗趙氏孀悶贖罪鈔各二千二百五十貫并收
贖鈔趙氏一十八貫孀悶一十五貫那禧贖罪穀三十
石封先白士斌各九石劉士俊張全徐貴趙玘姜秀趙

文泰楊得先沈榮曾鑒羅友質張倫張朝宗楊宣張經
楊伏秀馬汝節各七石俱發臨安府追完穀送預備倉
上納鈔收庫陳經原接受那端賄送土產七成色銀一
百兩銀壺一把重一十五兩金臺盞一副銀酒盃一箇
各重十兩係彼此俱罪之贓合入官發雲南府追解雲
南布政使司貯庫作正支銷各取實收繳照周憲原分
受那端贓銀一百兩銀壺一把金臺盞一副銀酒盃一
箇緣本犯身死那受等原刼去通凹鳩班等村牛馬猪

羊家財等項招稱殺食費用無存未到白氏等俱供狀
人張輔等俱遇草羅氏等係家人共犯俱免科並免追
提封愛壘等與土官知府那端副長官白琥俱另行及
叅照刀中成謀同親兄殺死親叔揆之於法死無足惜
但刀中成父刀匪為弔村寨被叔刀粉殺死以此刀中
成為父報讎亦將刀粉殺死彼此人命兩相抵償若將
本犯處決情似可矜元江軍民府土官知府那端爭奪
村寨殘害骨肉倚勾捕而令人擅殺小功尊長挾私忿

而調兵抄搶居民財物構禍經年不解誣奏積案無窮
本府因遠羅必甸長官司土官副長官白琥朋惡相濟
奏事不實俱合叅問如律但那端令人斬殺堂叔那受
并隨從人等俱係應死人犯其原抄家財又談委官照
依土俗講斷陪償明白各相和好况係邊方土夷性同
獸類若照律例提問又恐因生別釁且該府地方逼近
交趾車里等處外夷疆界亦須要人守把合無將那端
白琥免行提問與刀中成各照土俗因其情罪輕重量

為罰米送赴附近臨安府官倉收貯以為備邊之用等
因備呈照詳到臣批據按察司呈稱查得本司別卷一
宗為屢惡構兵殺搶村寨絕滅正枝謀殺祖母乞恩論
序官職等事內開鎮沅府土舍刀三猛刀賜等各因爭
襲祖職將各管下村民搶殺數多委官勘斷照依土俗
折算陪償該三司官將各犯分別情罪輕重量罰穀石
回報鎮巡衙門奏奉欽依轉行本司發落訖又查得元
江軍民府卷內正德二等年土舍那玟等與土官知府

那端忿爭村寨妄動夷兵殺虜人民混搶財物亦該三司官勘呈鎮巡衙門照依土俗斷給陪償那端等量為罰米贖罪奏奉欽依發落訖會同都布二司官議照刑憲之設所以律中夏而羈縻之制則以待遠人刀中成等既係極邊之人難盡繩之以法則其勸懲之典又當出於條格之外況其事情比與刀三猛等攻抄村寨殺擄無辜數多者事頗有間而彼且擬罰米贖罪及本卷前事亦有此例且刀中成情罪有可准折那端之殺那

受則又奏告年久屢次賠償數多况那受又係強盜殺人應死人犯若以彼中土俗論之恐亦足償厥辜矣及查勘合來文明開有照依土俗事例議擬之說律法既難於全科擬斷亦且有前例脫欲另行議處緣無別項事宜合無撫順夷情查照舊議將土官知府那端副長官白琥俱免叅提與同刀中成各量情罪輕重照例罰米刀中成那端各一百石白琥三十石上納贖罪以為備邊之用再照前項各犯不法揆厥所自皆因無賴之

徒投託土官土舍之家撥置搆扇以啓爭端及至禍結
又各駕挽虛詞妄行奏擾情甚可惡合無將李長春等
仍行各該衙門緝捕得獲查照律例從重問擬以戒將
來等因回報到臣除陳經等叅詳合律行將刀中成與
陳經照舊監候趙氏那禧嫡悶嫡先那旺封先白士斌
董全等各照罪名摘發封愛璽與李長春等緝拏究問
外會同鎮守雲南并金齒騰衝等處地方兼提督銀場
內官監太監史泰巡按雲南監察御史萬鑑看得前項

各犯節次奏告情詞重大既該整飭兵備副使吳便會
問明白刀中成若仍依原擬與那端俱犯該死罪以上
緣俱係極邊土夷驚猛貪恠乃其常性喜則為人怒則
為獸強必凌弱大必侵小自彼種類所不能無況刀中
成為父刀匪報讎殺死親叔刀粉以臣等妄議在律自
有正條當依父母為人所殺而子孫擅殺行兇人者律
杖六十但會問官拘於成案已經呈詳本院未示遂不
敢改擬耳或謂侄殺親叔與常人報讎不同臣聞漢有

後妻殺夫其子遂殺其繼母者有司當

闕

為京觀孰若好生大德懷鵠鵠以好音矧交趾相連去處地方險隘所在禦魑魅者不可缺人作屏蔽者不可易主所據前項各犯事情查與按察司呈稱先年處置夷情大率相同副使吳便所呈叅以三司所議與臣所見不過如此伏望皇上軫念邊民俯從愚悃特勅各該衙門計議合無照依臣等所議乃中成改擬免科那端白琥免行提問各照土俗那端罰米一百石白琥三十石

贖罪俱運赴附近臨安府官倉上納以為備邊之用各
犯徑與發落其陳經亦就定撥邊衛充軍追贓完日拘
連當房家小發遣仍再嚴加戒諭那端等各要恪遵朝
廷法度保守身家和睦宗戚愛卹百姓緝寧邊境如再
不改前非仍蹈舊轍構釁生隙擅調專殺自取滅亡後
悔無及庶幾情法兩盡而恩威並施矣緣那端白琥俱
土官陳經係論功定議軍職刀中成係原擬極刑今改
擬免科及節該奉欽依是這土官所奏事情着鎮守巡

撫巡按等官會同議處務要停當原委官員果有受財
偏枉等項就提問叅究了來說事理未敢擅便為此具
本差承差趙禎親齎謹題請旨正德十四年九月初六
日

貪官科害疏

題為貪官科害事據雲南布政使司分守洱海道右叅
議劉鶴年呈問得犯人陳洪招係楚雄衛前所百戶朱
錦下軍正德十四年六月內有本所今在散行副千戶

羅輔蒙上司行委徵收礦夫銀兩原定夫丁每名帶耗
徵銀一兩一錢羅輔自合照數徵收為當不合向各夫
丁誑說今年課銀都要足色好銀一兩七錢方纔交得
等語洪與一般礦夫今在陳潮樓保陳瑀未到王剛陳
瀚張濟張連平王郭友珍黃輔周鸞周華各不知誑哄
情由輒便聽信每人各出足色紋銀一兩七錢交與羅
輔收訖止出一兩一錢收帖與洪等執照計夫丁三十
名除該收正數外其餘七兩八錢羅輔不合侵騙入已

洪與陳潮陳瑀樓保不甘將情不合添捏虛詞具狀赴分巡洱海道告准行拘羅輔到官面審前情是實追出前誑銀兩給與各軍收領取領附卷將陳洪陳潮陳瑀樓保俱問擬不應減等笞罪的決照出千戶羅輔另行備招呈詳到臣除叅詳批行將陳洪等依擬發落外叅照雲南都指揮使司楚雄衛指揮使司前千戶所副千戶羅輔承委徵收礦夫銀兩加耗已為過取倍徵復以自私假誅求之政而助官為虐責固有歸行誑騙之計

而欺上罔下情尤可惡揆諸法律應合提問及照前項
礦夫原辦課銀俱係窮軍乾認額數軍丁以此被害者
不獨該衛數軍為然軍職以此營私者不獨該衛一官
如此官行殘民以逞之威軍抱浚我以生之歎非一日
矣臣近為議處國課以安邊民事奏蒙皇上明見萬里
悉依該部覆奏軍充礦夫一切查革地方生靈不勝感
戴天恩之至但恐屬軍衛此等無恥人員性習貪猥志
希苟得或於訪察不到去處仍前誑騙無告軍丁事敗

情露百纔十一若不嚴禁重治未免人心易翫弊政難除如蒙乞勅部院計議合無行令雲南撫巡官員通行所屬大小問刑衙門今後礦夫已奉成命查革外如有仍前指稱徵收課銀誑騙軍丁各主銀至二十兩以上者事發不分官吏軍民舍餘人等俱照各邊沿海常人盜銀二十兩發邊衛永遠充軍事例問擬發遣庶幾法嚴而下無輕犯弊絕而軍獲少安夷徼可保無虞大恩得以永訖便益緣係提問軍職及援例議刑事理未敢擅便

為此具本差承差楊文昭親齎謹題請旨正德十五年正月十七日

貪官害民疏

題為貪官害民事據雲南等處提刑按察司分巡洱海道僉事周愚呈奉臣批據楚雄府定遠縣民見監李玄狀訴為分豁久禁事行該本道問得犯人李悌招係本縣琅井巡檢司土舍丁正德十一年十二月內本縣地方盜賊生發有未到土官主簿李元珍不合帶領今在

官李玄黃冠未到楊漣等各不合跟同本官假以捕盜
為由前到今在官尹文德未到兄尹文政處嚇說你家
窩藏強盜快將銀兩送我本官及手下人方纔饒你尹
文政思係良民堅執不允李元等各散回報本官記恨
在心本月內李元珍捕獲已故賊首李朝等在縣不合
計同楊漣等并未到施恩等各不合依聽挾私教誘各
賊窩供說名尹文秀在內因而坐陷將尹文政捉挈拷
打勒令招認各不合聲言快將錢來買命尹文政只得

備銀一十八兩內將十兩送與李元珍二兩與李玄六兩楊溥等各分受入已方將尹文政放回本月二十六日廣通縣巡捕土官主簿段永聰并李元珍牌行與悌緝挈盜賊知得尹文政被李元珍等嚇受銀兩不合將伊捉挈嚇銀一兩五錢入已後伊將情狀赴巡撫范都御史處告准批行分巡洱海道牌行本府行縣拘提李元珍又不合懼罪逃脫止獲李玄與悌等送府審得尹文政久病將悌等解道審發本府監候問報間李玄

不合飾詞狀赴巡撫何都御史處訴准批行本道提弔人卷查審明白將李悌等問罪照出楊溥等與李元珍人贓另行備招呈詳到臣續為土官暴惡害民致命等事據雲南布政使司分守洱海道右參議劉鶴年呈奉臣批據定遠縣里長李宗亮狀告前事行該本官問得犯人王子明招係本縣民兵正德十二年二月內有散行在官土官主簿李元珍緣事提到按察司至正德十三年五月內事完回任不合令子明與同今在官一般民兵李

二各不合依聽與管下土民索稱父母官了事回還你
每都要備禮拜見等語衆民兵派定未到甲首者魯該
銀八兩者魯不合分派戶丁阿落出銀二兩比伊無措
將幼男希引出賣得銀一兩外添羊一隻折銀五錢送
與李元珍不合接受入已阿落尚有銀五錢未完者魯
又不合逼迫湊辦阿落無計於七月失記的日投河身死
伊未到妻張氏告理間李元珍懼罪將青布二疋者魯
將小牛一隻各不合買免張氏不合接受私和了訖本

年間本府已故陳知府行取民兵四名赴府聽用正德十年革去二名每名解銀六兩共銀十二兩送府李元珍以此考逼夷民不得安生致多逃竄本年七月內本府同知蕭澄應朝有署掌府印未到通判譚冠不合故違上司明文輒行本縣僉選兵夫二名護送比李元珍見得文書催緊自備白銀一十六兩解府送與蕭澄不合接受起行去訖李元珍將送過銀兩洒派管下八十四名民兵辦還每名科銀三錢共銀二十五兩二錢入已

有今在官李宗亮思得阿落係伊甲首戶丁致死且被
李元珍節次擾害不過將情狀赴巡撫何都御史處告
准批行分守劉叅議提弔子明等人卷到官鞫問前情
明白將李元珍省候王子明等問罪照出譚冠并者魯
等與李元珍蕭澄人賊另行備招具呈前來卷查臣近
為禁革科擾以安軍民事照得撫屬雲南地方最爾蠻
徼舟楫不通往來物貨惟資擔負山田收薄市井利微
差重民艱於今已甚各該土流衙門多有不才官吏苛

政如虎貪心似狼或徵收錢糧一斗收至二斗或收折銀兩一錢加及二錢貧戶罹非義之誅求私衙濫無名之取受被使令者多乘機以作弊掌支直者又指一而科十得來者視若輕微不足計較出辦者計其前後不勝累及以致軍民困苦盜賊恣睢今各官應朝在邇相應禁約查得朝覲事例司府官員跟隨阜隸不過六名州縣不過四名首領官不過二名路費聽鎮巡衙門定與數目於無礙官錢內支用不許擅自巧取一錢一物

行據雲南布政使司呈稱先年朝覲布按二司堂上官
長夫十名首領官三名吏典并書寫人役銀各十八兩
俱於本司濟用庫收貯贓罰銀內支給所屬各司府土
流官各長夫四名州縣土流及提舉司官三名首領官
二名俱於見役里甲內出辦等因已經批仰遵照舊規
支給及通行禁約所屬府州縣官查照則例不許分外
多帶一人多科一毫事發叅究去後又為撫安地方事
據雲南布政使司右叅議劉鶴年呈奉臣按驗前事呈

稱雲南地方管下小民半係夷獠近來標掠縱橫歲無寧日推原禍本實由土官若土官不行科擾夷獠自然安生而土官又被親管不才官員公行求索上官索之土官土官派之營長營長斂之火頭火頭取之小民夷獠小民既不能耕種又不慣經營不事搶刦何以應之盜賊不寧地方受害職此之故今欲嚴捕盜之法莫若清止盜之源若所管官司正已於上不行科擾土官土官縱有剝削亦少顧忌不至公然橫行而小民之困亦

得少甦乞行禁約等因談臣議得揚湯以止沸不若去薪而沸自止捕盜以安民不若治貪而盜自息貪官止見目下民之易虐豈謂異日天之難欺民之易虐今莫甚於邊遠天之難欺彼實付之茫昧監司乃復忍心坐視塞耳固聞罪則惟均法當先治又經通行撫屬大小衙門禁約遵守去後今據前因俱詳叅合律除批行各道將王子明李悌等依擬發落譚冠并者魯等行提問報聽用民兵查革外叅照雲南布使司楚雄府同知蕭澄

故違明例而擅取兵夫假託公差而私受賄賂定遠縣土官主簿李元珍因索拜見而致傷人命妄攀盜賊而嚇受民財罪已昭彰律當提問再照雲南地方去京萬里軍衛之雜夷糴者率以異俗自居府州之羣土官者多以僻郡自恕而執憲大臣又每疏其節目以務安全姑息因仍蓋非一日臣來蒞之初即加申飭奈何積習生常怙終不改如右叅議劉鶴年所呈者衙門豈惟楚雄一府流官豈獨蕭澄一員土官豈止李元珍一人而

各處往往有之臣除體訪禁約外如蒙乞勅都察院計議合無通行各處撫巡官轉行所屬軍衛有司大小衙門今後敢有非因緊急重大公務申奉撫巡官處明文擅於所屬土官衙門濫增差役科斂財物一夫一文及巧立名色如行取聽用民兵僉選護送兵夫之類并有將自己貨物散與發賣或低價買物多取價利致令科斂者事發俱照求索土官夷人財物事例問發邊衛充軍若土流屬官阿意奉承一體查叅從重究治庶人心

有警邇遠知畏盜源可清民瘼可息緣係提問在外五
品文職并土官及議處法例事理未敢擅便為此具本
差承差段鰲親齎謹題請旨正德十五年正月二十九
日

貪官違法疏

題為貪官違法等事據雲南布政使司分守金滄道右
叅議劉鶴年呈奉臣批據大理府大和縣民充雲南縣
佉甸巡檢司吏楊玉枝狀告前事及據本巡檢司弓兵

楊接告為違法事俱批行該本官問得犯人任大雄招
係四川順慶府岳池縣人由吏員任大理府趙州雲南
縣徐旬巡檢司巡檢正德十二年六月二十五日到任
本司額設弓兵三十六名除投軍死絕外見在三十二
名先年撥將一十六名跟隨散拘今在土官巡檢李欽
緝捕盜賊正德元年以來李欽不合將未到弓兵李應
李清李甫二楊勝光蘓山五名役占辦納月錢每年每
名出銀一兩二錢一年共銀六兩俱交與李欽不合收

受入已令各歇役在家致缺巡邏盜賊生發地方不寧李
欽罪名遇蒙正德九年正月二十八日赦宥不合不行
首正至正德十三年連前通計李欽得過銀七十八兩
大雄係掌印官不合不行查舉本年十一月二十八日
有今在弓兵楊接被賊偷去黃牛一隻報與土官李欽
隨差未到弓兵李甫等將牛爪見送到李欽處本官不
合令未到弓兵楊五四去與楊接索說土官已尋獲原
牛要你備禮相謝取贖等語比伊只得揭借鹽一百塊

值銀六錢憑今在弓兵楊松送與李欽不合接受入
已方將前牛給領訖本年十二月內李欽指稱答應
往來公差使客為由又不合科斂李暹等三十二名每
名穀二斗又令未到弓兵蘓威英羅六等於徐甸一村
分投科斂未到軍民客戶張子恭等四百六十八家每
家穀二斗連前共穀一百石俱送與李欽不合接受入
已正德十四年二月內大雄不合將蘓威英羅六并未到
弓兵張祥李繼森楊鳳輪流役使每名役過三日共

一十五日本年四月內布政司將在官楊玉枝撥補本
巡檢司已問革吏杜鳳名缺比杜鳳不合向楊玉枝索
討頂頭銀兩不與將情具告兵備林副使處行提杜鳳問
罪革役發落訖五月初一日楊玉枝著役間杜鳳又令
伊未到父杜達將楊玉枝揪擒復討前銀比楊玉枝又
將情口告大雄與李欽處一向不與分理楊玉枝懷恨
將各役占弓兵及楊接亦將李欽科斂財物實情各不
合添捏虛詞混同具狀赴巡撫何都御史處告准俱批

行分守金滄道劉叅議將大雄等行提到官查審委的前情明白將任大雄楊接等問罪照出李欽人贓另行備招呈詳到臣除叅詳合律批行將任大雄等依擬發落外叅照雲南布政使司大理府趙州雲南縣徐甸巡檢司土官巡檢李欽私占弓兵辦納銀兩惟知得利肥己不顧捕盜缺人緝獲贓牛索取失主財物指稱使客科斂緊村人戶事皆違枉律合提問及照各處巡檢司之設專為盤詰奸細防禦盜賊而雲南建置獨多蓋緣所屬

地方民夷雜處競爭為性剽搶成風故各司弓兵多係土著比與別省僉編不同而該司巡檢復設土官得與流官相兼行事欲其習知地利覺察種類無分彼此各有責成奈何此等流官不過老吏出身受寄如同木偶土官又係凶族遺孽習尚無異狼貪賣放索求積年常事禦盜之人去而為盜要害之地益以生害簡書弗畏在在有之查得見行條例內一款各邊關堡墩臺等項守備去處若官軍用財買閒者官員問罪調極邊衛分

旗軍人等發沿邊枷號一箇月常川守哨又一款文武
職官索取土官夷人徭撞財物犯該徒三年以上者俱
發邊衛充軍今照雲南係西南極邊地方關隘巡司所
係亦重但前項事例止言邊備官及文武職官而各處
土官憫其夷俗冥頑未曾議及以故狎恩玩法全無畏
憚今不嚴禁重治將來日復一日地方豈有寧時如蒙
乞勅都察院計議合無查照前例叅酌科斷今後沿邊
一帶土官巡檢敢有不以地方盜賊為意仍前賣放弓

兵致令盜賊標掠貽患軍民者事發到官其土官比照
文武職官索取夷人財物犯該徒三年以上者發邊衛
充軍其弓兵若用錢買閒歇役者亦問擬枷號發落庶
幾法令明嚴人心警畏邊壤生靈少獲安息緣係提問
土官并乞議處條例事理未敢擅便為此具本差舍人
余定親齋謹題請旨正德十五年二月十二日

何文簡疏議卷五